



Felles Landbrukskontor ÅLA

Aurland, 16.06.2019

Valdansvarlege

Vår ref.
19/62-10

Dykkar ref.

Sakshandsamar
Øi Knut Fredrik, 57641200

Arkiv
K2 - K40, K1 - 223

Informasjon om hjort- og elgjakta i Aurland 2019

I det følgjande har me oppsummert hovudpunktata knytt til hjort- og elgjakta i 2019. Informasjonen vert sendt ut på e-post slik at det er lett for dykk som valdansvarlege å senda vidare ut til grunneigarar og jegerar i dykkar vald. Informasjonen vert også sendt ut i brevform, med det formelle fellingsløyvet (som skal fyllast inn og leverast når jakta er over).

Det er framleis spanande tider for hjorteviltet og oss som lever med og av dyra. Alle 15 kommunar i Nordfjella-regionen er no bedt om å redusera bestandane av hjort og elg til under halve storleiken av 2016-nivået. Dette for å hindra at skrantesjuke får fotfeste i hjort- og elgbestandane. Lærdal og Aurland kommunar er bedt om å redusera ytterlegare fordi me har spesielt tette hjortebestandar og eit stort overlapp med Nordfjella sone 1.

Førebelts er det ikkje påvist smittsam skrantesjuke på korkje hjort eller elg, noko som er godt nytt. Dette gir håp om at me skal klara å utrydda sjukdommen.

Jegerane i Aurland var utruleg flinke til å fella mykje hjort (234) og elg(10) i 2017. Ein tøff påfølgjande vinter med høg dødelegheit, saman med fellinga i 2017, resulterte i at jegerane såg mykje mindre hjort i 2018. Fellingsresultatet endte i 2018 på 151 hjort, noko som er lågare enn vanleg. Kanskje spelte også mykje därleg ver i september og oktober ei rolle hausten 2018? Men mykje truleg er hjortebestanden i Aurland redusert. Me må likevel halda trykket oppe endå eit par år før me har den tettleiken som er tilrådd. Jegerane såg lite kalv førra haust. Med ein snill vinter no, kan me kanskje forventa ei rekordhøg kalving? Det vert spanande å sjå kva jegerane registrerer gjennom jakta denne hausten!

I punkta under prøver me å lista opp viktig informasjon for jakta til hausten. Om det er spørsmål, er det berre å ta kontakt!

Kvoter

Bestandsplanen for hjort 2018-20 legg føringane på løyvetildelinga. Vedlagt er ein oversikt over tildeling til dei ulike valda, både for hjort og elg. Dei valda som er medlem i Aurland bestandsplanområde for hjort (45 av 54 vald), kan også nytta ubrukte fellingsløyve på hjort frå 2018 i 2019. Dette gjeld kun for hjort. Totalt vil det då vera 543 fellingsløyve på hjort og 20 fellingsløyve på elg tilgjengeleg for hausten 2019.

Aurland kommune/Aurland bestandsplanområde for hjort har søkt Miljødirektoratet om dispensasjon til å ha fri kvote på kalv og ungdyr. Om denne vert godkjent, vil det ikkje vera noko avgrensning på tal kalvar og ungdyr som kan fellast. Info om dette kjem når me har fått svar på søknaden. Fordelinga på planlagt felling er beskrevet i bestandsplanen, men kjem også fram i vedlegg med oversikt over kvoter.

Utfordringa no er at me skal fella meir hjort enn dei fleste i utgangspunktet vil ønskje. Det vil då verta lengre mellom hjortane. Likevel lyt me halda oppe jakttrykket og me må forventa at me treng meir tid på fellingane. Om me klarar å redusera stamma ved å jakta hardt på kalvar, unge/små dyr og koller, vil me truleg forma hjortestamma til ein endå sunnare bestand. Hugs at dei vaksne bukkane har viktige funksjonar i bestanden. Ofte får dei litt for hard beskatning i jakta.

Jakttid

Jakttida for hjort og elg i Lærdal/Aurland/Årdal er i utgangspunktet 1. sept – 23. des. Alle 15 kommunar i Nordfjella-regionen har gått saman om ein søknad om utvida jakttid både for hjort og elg. Det gjenstår å sjå kva denne vil opna for. Uansett vil ein eventuell utvida jakttid for å nå fellingsmåla verta gjenstand for diskusjon lokalt før den vert ein realitet. Om me klarar å fella mykje hjort i normal jakttid, vil det heller ikkje vera trong for utvida jakt. Likevel vil januar mange plassar vera ein effektiv tid å målretta ta ut kalvar og ungdyr fordi mykje hjort då er nede på innmarka. Info om eventuelle endringar vil koma når Miljødirektoratet har handsama søknaden.

CWD – prøvetaking

Alle felte dyr som er vaksne skal jegerane ta prøve av sjølv (altså ikkje kalvar og 1,5 åringer). Jegerane i Aurland har vore flinke til å ta prøvar dei siste åra, bra jobba! Prøveresultata er svært viktige for vegen vidare. Info og utlevering av prøvemateriell skjer som i fjar, på jegermøte i august og i kasse ved fiskehuset ved Turlidfossen. All generell informasjon om CWD er samla på: <http://www.hjortevilt.no/skrantesjuke/>

Jegermøte

Me tek sikte på å ha eit jegermøte i august. Det er mykje info og sikkert ein del spørsmål. Info om dato og stad for møtet kjem seinare.

Helikopter

Me jobbar for å få til ei vidareføring av tilbodet om utflyving av slakt frå hjort- og elgjakta. Info om dette kjem når me veit meir.

Sal av slakt

I 2017 vart det etablert kjøtmottak og viltbehandlingsanlegg på Håbakken og i Flåm. Dette er operativt også i 2019. Her er det også høve til å hengja opp slakt i påvente av svar på CWD-prøve om nokon skulle ha behov for dette.

Sett-og-skutt

All jakting skal registrerast på www.settogsutt.no. Planen er at settogsutt skal verta ein app før jakta til hausten. Settogsutt fungerer no veldig bra og gir oss moglegheit til å følgja med på fellingsresultatet undervegs i jakta. Me kan då også vurdera om det er naudsynt å forlengja jakttida eller å stimulera på andre måtar. CWD-prøvene skal registrerast på settogsutt slik at de kan finna att prøveresultatet på www.hjorteviltregisteret.no. Settogsutt og hjorteviltregisteret skal slåast saman før jakta, så det kan hende det kjem nokre endringar på adressa som skal nyttast. Info om dette kjem.

- **Viktig:** I 2018 vart det gjort nokre endringar på korleis jegerane skulle registrera jaktinga si på settogskutt. I korte trekk var endringa den at alle observerte dyr skulle registrerast, uavhengig av om dyret med sikkerhet var sett fleire gonger/av fleire i jaktlaget. Me trur ikkje mange fekk med seg denne endringa, og endringa var heller ikkje godt marknadsført. I tida no er sett-hjort-registreringane viktigare enn nokon gong fordi me på den måten kan følgja med på endringane i bestanden opp i mot målet om reduksjon. Ei endring i måten å føra på er difor uheldig fordi det vert vanskelegare å samanlikna tala mellom åra. Difor har me beslutta at me IKKJE VIL FØLGJA endringa som det er lagt opp til i føring av sett-hjort. **Alle jegerar i Aurland skal altså føra sett-hjort som før 2018, og ikkje ta hensyn til endra instruks! Ergo, registrer sett-hjort som «vanleg»!**

Human jakt

Sjølv om det er ambisiøse mål om høg felling, er det viktig at de tenkjer sikkerheit og human jakt når de er ute. Skyt kalven før kolla! Hugs plikten til å ha tilgang på ettersøkshund – og bruk hunden når uhellet er ute! Her har me ein del å gå på!

Merka hjort

Det er framleis hjort som er merka med GPS-halsband, sjølv om nokre har sluppet klava no. Ingen av dei merka dyra bør skytast i jakta. Om du skulle vera uheldig å fella ein merka hjort, ta kontakt med underteikna, så ordnar me saken. Klavane er utstyrt med sokalla «drop-off» som gjer at klavane fell av ved tomt batteri.

Samarbeid

Dei valda som er medlem i bestandsplanområdet har moglegheit til å flytta løyve mellom valda, og mellom åra i bestandsplanperioden. Dette er brukt i ein viss utstrekning, men det er ønskjeleg å nyttre dette endå meir. Alt som trengs er ei skriftleg avtale om samjakt for å bytta/selgja/flytta løyve. Ferdig formular ligg på heimesida til kommunen. Det valdet som får fellingsløyvet tildelt, skal rapportera resultatet, uavhengig av om løyvet er nyttet på eit anna vald. På settogskutt registrerer jegerane fellingsafta på det valdet som dyret vart jakta på. Fellingsavgifta vert fakturert valdet som fekk løyvet. Det som truleg vil vera begrensande for jaktuttaket til hausten er jegeranes tilgjengelege tid til å jakta. Dei valda som «føler seg ferdig» med å jakta i løpet av hausten og som har mykje dyr i terrenget, bør vurdera om dei kan sleppa fleire jegerar inn i terrenget. Dette kan gjerast anten ved at jegerar har med «eigne fellingsløyve» eller at fleire jegerar kan koma inn og jakta på dei løyva som er gitt det aktuelle valdet.

Fellingsavgift

Avgift ved felling i 2019 er som følgjande:

Fellingsavgift:	2019
Voksen hjort	411
Hjortekalv	0
Voksen elg	537
Elgkalv	0

Skitt jakt!

Med helsing

Magnhild Aspevik
landbruksjef

Øi Knut Fredrik
Sakshandsamar

Vedlegg:

Dok.dato

16.06.2019
16.06.2019

Tittel

Aurland hjortevald 2019
Aurland elgvald 2019

Dok.ID

198621
198622